

Naalakkersuisunut apeqqut:

Nunaqarfiit ilaanni talittarfeqarnikkut ajornartorsiutaasartut pillugit Naalakkersuisut qanoq pilersaaruteqarpat?

(Inatsisartuni ilaasortaq Loretha Henriksen, Kattusseqatigiit Partiiat)

Akissut.

(Ineqarnermut, Attaveqarnermut Angallanermullu Naalakkersuisoq)

Aallarniutigalugu Inatsisartuni ilaasortaq Loretha Henriksen nunaqarfinni umiarsualiviit pillugit apeqquteqarneranut qujarusuppunga. Taamaalillunga suliasaqarfinni killiffik pillugu naatsumik nassuiaateqarnissamut periarfissinneqarpunga.

Nunaqarfinni tamangajanni talittarfinnik assigiinngitsunik angissuseqartunik pitsaassuseqartunillu peqarpoq, tassanilu Naajaat, Qaanaamilu nunaqarfiit Savissivik, Qeqertat aamma Siorapaluk, kiisalu Itterajiviit kisimik peqanngillat.

Sumiiffiit talittarfeqanngitsut talittarfilerneqarsimannginnerinut, sumiiffinni taakkunani pingortitap prammunik usingiaanissamut naleqqunera, umiatsiallu ajornaquteqanngitsumik sissamut tulassinnaanerat pissutaavoq. Tamanna pissutaasimagunarluni sumiiffinni pineqartuni talittarfiliornissamut aningaasaliinissaq naleqquttutut isumaqarfigineqarsimanngilaq.

Namminersorlutik Oqartussat nunaqarfinni Arsummi, Iginniarfimmi, Akunnaami, Ikamiuni, Kitsissuarsunni aamma Upernavik Kujallermi puttasuliorsimapput.

Puttasut tinittarnera ulittarneralu apeqqutaatinnagu ajornanngitsumik isumannaatsumillu nunamut ikaarnissamut periarfissiipput. Taamaakkaluartoq puttasunik sananissamut tunuarsimaartarpugut. Puttasut mallinit sikusarneranillu ajoquserneqarnissamut ulorianartorsiortinneqartarput, aammalu puttasut ukiuunerani nunamut qaqinneqartarlutik. Taamaattumik ingerlatsineq aserfallatsaaliuinerlu eqqarsaatigalugit puttasut akisuujupput. Tamanna pingaartumik nunaqarfinni umiarsualivii illersugaanngitsuni atuuttarpoq.

Kisiannili sumiiffiit ilaanni pissutsit umiarsualiviit pitsanngorsarneqarnissaannut naleqqussinnaammata Naalakkersuisut eqqumaffigaat, tamannalu umiarsualivinnut pilersaarutinut ingerlaavartunut, ilaatigut 2006-imi upernaakkut ataatsimiinnermi saqqummiunneqartunut ilaatinneqarpoq. Ukiuni kingullerni umiarsualivinnik nutaanik sananissamut iluarsaassinissamullu aningaasaqarnikkut akissaqartitsisoqarsimanngilaq. Umiarsualivinnut aningaasanik atugassii-soqaqqissinnaalapat, nunaqarfinni talittarfiit pillugit ajornartorsiutit Naalakkersuisunit isiginniarneqassapput.

Naggasiutigalugu ilanngutissavara, Assartuussineq pillugu Isumalioqatigiissitap isumaliutissiissummini, ukiup naanerani Naalakkersuisunut tunniunneqartussatut naatsorsuutigineqartumi umiarsualiviit pillugit isummersuutini ilaatittussaammagit – taakkunungalugu aamma nunaqarfinni umiarsualiviit ilaapput.